

# Preguntanan pa Karnavalistanan

“Lupercalia” ta un palabra deskonosí pa nos. Ma maske e palabra aki no ta forma parti di nos vokabulario, e fiesta ta bon konosí bou di un otro nòmber.

Lupercalia a originá komo un fiesta religioso na Roma antiguo. Ku tempu el a degenerá i bira un fiesta hidonista, ku plaser komo e meta prinsipal. Suidadanonan desfrasá a hasi tur klase di chansa i inmoralidat sin temor di ser rekonosé i sufri represalia, komo ku mayoria lei a keda suspendé pa e fiesta aki.

Papa Gregorio na aña 600 A.D. a fiha e fiesta aki komo e dia promé ku Djarason di Shinishi. Propósito di e fiesta libertino aki tabata pa hende por sasia nan deseonan promé ku nan mester sakrifiká “tur deseo karnal” pa 40 dia di penitensia, Kuaresma. Nos konosé e fiesta aki komo “karnaval”.

Esaki ta lamta algun pregunta importante ku kada karnalista sinsero lo ke pensa bon.

**Pregunta #1: Kuantu plaser ta legítimo pa sasia durante karnaval? Kiku ta e límite?** Den konsenshi di kada pèrsona tin un liña invisibel ku ta distingí entre loke ta aseptabel i loke ta malu. Hende tin un tendencia pa yega asina serka e límite ku ta pusibel, i kisas surpas’é...djis pa un ratu! Esaki ta enkurashá durante karnaval! Ma e pensamentu aki ta produsí vários problema adishonal.

E liña entre loke ta aseptabel i loke ta piká por move. Kòrda un ratu: Loke a shòk nos dies aña pasá, awe ta aseptá komo normal. Algun aña pasá “Lambada” i “Baile de Perrito” a pone hopi hende kuestioná unda nos ta bai. Ma e liña a sigui muf den direkshon di degenerashon. Awor “Sak’e Boemboem” ta okashoná e mésun pregunta. Si ningun hende ta buta pia abou manera (danki Dios polis a hasi na nos isla, e liña di indesensia i inmoralidat ta sigui muf den direkshon di karnaval di Rio de Janeiro unda ta saka mas ku “boemboem!”

Ta notabel ku karnaval i alkohòl ta inseparabel. Hopi hende ta dependé di bebida pa trankilisá nan konsenshi miéntras nan ta gosa e “verboden vruchten.” Alkohòl por kalma e konsenshi pa un ratu, pero no pèrmanente. Mañan bo tin ku biba ku un konseshi ku ta kulpábo pasobra bo a viol’é.

**Pregunta #2: Dios ta aseptá e konsepto ku hende por sasia nan deseonan karnal, promé ku nan ta bai bandoná nan piká?** Suponé ku un ladron ta rasoná, “Mi ta bai stòp di hòrta durante kuaresma. Ma pa mi por keda sin hòrta e temporada aki, mi mester hòrta hopi kos e siman promé pa sasia mi deseo pa hòrta.” Kua hues lo aseptá e argumento ei? Dios, e gran Hues hustu, no ta aseptá rasonamentu asina tampoko!

Ta un echu ku kada bes ku bo ta sasia bo deseonan, ta bira un tiki mas difisil pa hasi loke ta bon otro biaha. Lo kontrario tambe ta bèrdat. Dios ta deseá “dominio propio” (Galationan 5:23). Nunka por laga slèk moralmente.

**Pregunta#3: Leinan di Dios ta keda suspendé pa karnaval?** Un hende por ta masha deboto henter aña, ma ke gosa un dia so den aña. E pèrsona aki por sufri pa sobrá di su bida. E por kontagiá un enfermedat venérikò ku ta tortur’é ku regularidat pa e restu di su bida pasobra el a gosa un dia so na karnaval. Leinan di Dios ta vigente tur 365 dia den aña. Loke tabata piká ayera, ta piká awe, i ta keda piká mañan—asta riba dia di karnaval! No tin sierto fecha ku piká ta legítimo. Dios no ta “kijk door de vingers” riba dia di karnaval.

**Pregunta #4: Gosa awor! Dios lo no pordoná tòg despues?** No lubidá ku Dios sa tur kos. “No tin ningun kriatura invisibel p’E, ma tur kos ta sunú i habrí dilanti wowonan di Esun ku Ken nos tin di hasi” (Hebreonan 4:13).

Bo por pensa, “Despues di karnaval, lo mi komportámi...durante kuaresma, i kisas te e próksimo karnaval. P’esei djòdjò awor, i pidi Dios pordon despues.” Bo por gaña bo mes, ma no Dios! Dios ta pordoná sabiendo ku bo tin hinká den bo kabes pa sigui gosa piká? Djòdjò anto bai tuma krus di shinishi--ni mil krus--no ta garantisá Dios Su pordon! Dios ta para riba ku hende mester BANDA piká no POSPONE piká! “Laga e malbado bandoná su kamina, i e hende in hustu su pensamentunan; i lag’é bolbe serka SEÑOR, i E lo tin kompashon kun’é; i serka nos Dios, pasobra E lo pordoná abundantemente” (Isaias 55:7).

Dios ta pordoná, ma solamente pa esun ku ta atmití ku e ta un pekadó, ta bandoná su piká i ta konfia Hesu-Kristo so pa salb’é di e kastigu ku su piká ta meresé na fiernu. Si bo ta hasi esei, bo por haña Dios Su pordon awor mes.